

15/04/1997

Dr M jamin galak usahawan ke Mesir

Wan Jailani Razak

KUALA LUMPUR, Isnin - Datuk Seri Dr Mahathir Mohamad memberi jaminan untuk menggalakkan usahawan Malaysia meneroka peluang perdagangan dan pelaburan di Mesir.

Menurut Perdana Menteri, perdagangan antara kedua-dua negara kebelakangan ini meningkat dengan baik tetapi nilai dagangan masih kecil dan hanya membabitkan beberapa barangan saja.

"Malaysia melihat Mesir sebagai rakan dagang yang akrab dan satu saluran paling baik untuk sampai ke negara-negara Arab dan Afrika yang lain.

"Berdasarkan pertimbangan itu, Malaysia akan menggalakkan sektor swasta menceburi bidang perdagangan di Mesir," katanya di majlis jamuan malam meraikan kunjungan Perdana Menteri Mesir, Dr Kamal El Ganzouri, di Sri Perdana, di sini, malam ini.

Perdana Menteri berkata, dengan semangat perpaduan Islam dan kerjasama Selatan-Selatan, sudah wujud rangka kerja yang sah dan perlu untuk menjayakan hubungan dua hala Malaysia dan Mesir.

Kedua-dua negara sudah menandatangani perjanjian usaha sama mengenai perdagangan, teknikal, saintifik, kebudayaan, ekonomi dan pengangkutan udara.

Menurutnya, ketika ini, beberapa perjanjian baru sedang di peringkat akhir kajian membabitkan jaminan pelaburan, wakaf dan perhubungan keagamaan pelancongan, mengelak cukai berganda serta sains dan teknologi.

Kata beliau, walaupun wujud banyak peluang kerjasama tetapi interaksi kedua-dua negara dalam bidang terbabit belum mencukupi.

"Malaysia selalu menganggap Mesir sebagai pemimpin negara Asia Barat dan blok Afrika dan kita meletakkan keutamaan yang tinggi untuk membangunkan kerjasama lebih rapat dengan Mesir.

"Bagaimanapun, sehingga kini, kita belum berjaya dalam merealisasikan kerjasama yang berkualiti yang dihormati sebelum ini," katanya.

Dr Mahathir juga berkata, Malaysia dan Mesir mengenal pasti negara Islam mempunyai keupayaan untuk memainkan fungsi lebih penting ke arah mewujudkan keamanan dan kestabilan sejagat.

Perdana Menteri berkata, ini tidak akan dapat dicapai kecuali umat Islam benar-benar mempercayai konsep semangat persaudaraan Islam dan berhenti menggunakan Islam sebagai alasan menindas dan menjejaskan kestabilan negara umat Islam.

Di Asia Barat, katanya, persoalan Palestin dan konflik Arab-Israel tidak dapat diselesaikan kerana sikap Israel yang tidak jujur dan angkuh.

Beliau kesal tindakan Israel yang sepatutnya dikutuk, sebaliknya perkara itu dilindungi oleh negara tertentu.

(END)